

**Namminersorlutik Oqartussani pisortaqrifiini allaffissornerujussuup millisarnissaa siunertaralugu, sulinerup pitsaassusaanik innarliinngitsumik, periutsit suleriaatsillu suut atorunnaarsinneqarsinnaanersut pillugit Naalakkersuisut nalunaarusiornissaannik Inatsisartut aalajangiiffigisassaattut siunnersuut. Nalunaarusiaq UKA2026 nallertinnagu Inatsisartunut agguanneqassaaq.**

(Inatsisartunut ilaasortaq Aqqalu C. Jerimiassen, Atassut)

**Akissuteqaat**

(Aningaasaqarnermut Akileraartarnermullu Naalakkersuisoq)

**Siullermeerinnineq**

Siunnersuummut qujanaq. Pisortat ingerlatsiviannik pisariinnerusumik ingerlatsinissamut pisariaqartitsisoqarneranik siunnersuuteqartoq Naalakkersuisut isumaqatigillunnarpaat.

Pisortat ingerlatsiviat minnerusoq namminersortut pisortallu pisariaqartitaannik isumalluutinik atugassanngortitsisinnaavoq, utoqqaallu amerlanerulerlutik sulisinnaasut ikinnerulernerannik innuttaasut katitigaanerannik passussisariaqarluni.

Innuttaasut katitigaanermi allanngornerat peqqinnissamut utoqqarnullu immikkoortumut ilungersunartorsioortitsissaaq, taamaattoqarneranilu pisortat ingerlatsiviani, Namminersorlutik Oqartussani kommuninilu, pingaarnersiunerit aaqqissuussaanerlu isorinninnerusumik qissimigaartariaqarparput. Allaffissornermi aporfiit suussusersineqassapput piarneqarlutillu, tamatumani ataatsimut periuseqarnissaaq pisariaqarpoq, suleriaatsimmi pisariusut namminersorlutik oqartussat kommunillu periusiannik patsiseqarmata.

2015-imit 2023-mut Namminersorlutik Oqartussani ulloq naallugu suliffeqartut 340-nik amerlipput, kommuninilu 701-inik amerlillutik. Naalakkersuisut Attasiinnarnissamut Ineriartortitsinissamullu Pilersaarut II-mi 2023-meersumi pisariillisaanernik suliniuteqalereerput. Naalakkersuisut ilaatigut Politikikkut Ataqatigiissaarisooqatigiinni kommunit peqatigalugit misissueqqissaarnernik, pisortat ataatsimoorussamik aaqqiissutaannik digitalinngorsaanermillu tunngaveqartumik kaammattuuteqarnissamik suleqatigiipput.

Inatsisit pisariitsut digitalinngorsarneqarsinnaasullu allaffissornermik annikilliliinissami pingaaruteqarput, tassanngalu qulakkeerinissaaq Naalakkersuisut Inatsisartullu tamarmik akisussaaffigaat. Namminersorlutik Oqartussani tamani ataatsimut allaffissornermik malittarisassanillu misissuineq pisariullunilu isumalluuterpaalunnik atuiffiussaaq. Taama misissueqqissaarnernik immikkullu ilisimasanik naalakkersuisoqarfinni naammattunik pigineqanngitsunik pisariaqartitsisoqassaaq. Tamatumani minnerunngitsumik pitsaassutsip innuttaasunillu ikiorsiissutit ajonerulersinnagit pisariillisaanerit pitsanngorsarnissaat kissaatigineqarpat. Qanorluunniilli pisoqaraluernerani, allaffissornermik annikillisaaneq pisortanit ikiorsiissutinik sullissinermillu assigiissaarineramik pisariaqartitsiviunissaa nassuerutigineqassaaq.

Taamaamat immikkoortuni pingaarnersiukkani pisariillisaanermik periarfissalinni Naalakkersuisut aallartitsinissaat, Naalakkersuisut taarsiullugu siunnersuutigaat.

Isumalioqatigiissitanut annertuunut isumalluutinillu atuiffiusunut taarsiullugu, avataanit siunnersortit suleqatigalugit misissueqqissarnerit aalajangersimasut suliarineqarsinnaapput. Misissueqqissaarnerit aalajangersimasumik piffissalernerqarlutillu ersarissumik piginnaatitaaneqassapput, taamaalilluni pisortat ingerlatsivianni angusaqarluarnerusumik isumalluutinillu agguataarilluartumik ilapittuisinnaaqullugit. Suliat ineneri Naalakkersuisut ukiumoortumik aningaasaqarnikkut ingerlatsinermik nalunaarutaanni aningaasaqarnermullu inatsimmut pingaarnersiuinernut ilanngunneqarsinnaapput.

Naalakkersuisut siunnersuutip anguniagai tunngavitsigut isumaqatigai, Naalakkersuisulli nalunaarusiornani suliaq allartinneqapallannissaa kissaatigaat.

Taakku tunngavigalugit naalakkersuisut allannguutissatut siunnersuut tullituttoq akuerineqartussatut innersuullugu saqqummiuppaat:

***”Pisortat ingerlatsivianni aningaasartuuteqarfinni pingaarutilinni ukiumoortumik aningaasartuutiniq misissueqqissaarnernik ingerlatsinissamik, taamaalillunilu suliasamik naammassisaqarsinnaanerit pisariinnerulersinniarlugit isumalluutinillu siunertanut allanut atugassiinnaajumalluni, Naalakkersuisut peqquneqarnissaannut Inatsisartuni aalajangiiffigisassatut siunnersuut. Tamanna ilaatigut pisortani malittarisassanik, suleriaasinik kiisalu naapertuunnerusumik aaqqissuussinikkut pisinnaavoq, taamaasilluni allaffissorneq annikillisarneqarluni.”***